

agnoverit, licet Imperium quatuor tantum Praefectos Praetorio, & illa multo plures Exarchos seu Primates, quam hoc Vicarios, nec semper iidem limites essent Metropolitanorum, & Praesidum provinciarum; imò saepè factum sit in ordine Ecclesiastico, ut civitas unius provinciae subjecta & suffraganea esset Metropolis civilis alterius provinciae vicinae. Quae autem dioeceses, provinciae & civitates in unoquoque Patriarchatu fuerint, in singulorum descriptionibus & tabulis annotabimus.

Porro si quae fortè sedes Episcopales; praeter eas, quas velut è tenebris innumeras eruimus, à nobis omittantur, & adhuc tenebris ipsis obvolutae remaneant, ignoscet, ut spero, Lector. Siquidem in aurifodinis fossoribus etiam perspicacioris visus venia datur, si quaedam auri semina inter arenas reliquerint: sicut & primis qui in regiones aliquas descendere, si earum loca quaedam adhuc ignota in relationibus suis omittant. Si post aliquot annos iterum in orbem Ecclesiae hunc lustraturus venero, nova forsitan dabo. Interim grato animo Lector accipiat, quae lubenti & benevolo nunc largior.

